



Siège Paroissial : Centre Paroissial 10, Rue Etienne Lebeau
Lieu de Culte : Église Saint-Denis , 8 Place de l'Église 91200 ATHIS-MONS
Tél : 01.69.38.53.26 & 06.52.53.22.56 & 06.41.84.95.81

« ... *Manompoa ny Tompo amin'ny fifaliana ; mankanesa eo anatrehany
amin'ny fihobiana* » (Salamo 100 :2)

ALAHADY 03 OKTOBRA 2021

ALAHADY FAHA XVIII MANARAKA NY TRINITE

FANATERAM-BOKATRA

FANOMPOAM-PIVAVAHANA FANAOVAM-BATISA SY FANOKANANA HO MPANDRAY VAOVAO

FANDRAISANA NY FANASAN'NY TOMPO

Mitarika :Ny Mpitandrina RAVELOSON Josiane

Mitoriteny : Ny Mpitandrina RAZAFIMAHATRATRA Marcellin Ismaël

Zava-maneno

Mpitarika: Amin'ny anaran'ny Ray sy ny Zanak'ny Fanahy Masina.

Fiangonana: Amen

FIARAHABANA APOSTOLIKA

FIHAONANA SY FANKALAZANA AN'ANDRIAMANITRA (mitsangana)

Salamo Fiderana

Mpitarika : *Hiara-mankalaza sy hidera an'Andriamanitra isika amin'ny famakiansika ny Salamo*

Fiangonana: «1 Sambatra izay rehetra matahotra an' i Jehovah, Dia izay mandeha amin' ny lalany.2 Fa hohaninao tokoa ny asan' ny tananao; Sambatra sady ambinina ianao.3 Ny vadin' dia tahaka ny voaloboka mahavokatra Ao anatin' ny tranonao; Ny zanak' dia tahaka ny zanak' oliva Manodidina ny latabatrao.4 Indro, fa toy izany no hitahiana Izay lehilahy matahotra an' i Jehovah.5 Hitahy anao avy any Ziona anie Jehovah; Ary ho faly hahita ny fahasovan' i Jerosalema anie ianao Amin' ny andro rehetra hiainanao.6 Eny, hahita ny zafinao anie ianao; Fiadanana anie ho amin' ny Isiraely.Haleloia ! Amen » (Salamo 128)

Hira 3

VAVAKA FANATONANA SY FIDERANA

Feon-java maneno fohy.

VAVAKA FIFONANA SY FIAIKEN-KELOKA

Fiangonana: Ry Rainay be famindrampo ô, mitalaho Aminao izahay; mamela ny helokay; diovy izahay ho afa-pahotana; sasao izahay mba ho afa-keleka ; ary havaozy ny fanahinay mba ho vonon-kanompo Anao. Ny fitiavan'i Jesoa Kristy Zanakao Mpamonjy anay no angatahanay Aminao. Amen

Hira 407 :1

TENY FAMELAN-KELOKA SY FIHAVANANA

Mpitarika : *Andriamanitra mamindra fo sy miantra, mahari-po sady be famindrampo sy fahamarinana ny Andriamanitsika , koa mitsangana, hoy Izy aminao* : « Fa na dia hifindra aza ny tendrombohitra, ary na dia hihetsika aza ny havoana, tsy mba hiala aminao ny famindrampoko ary tsy hitsoaka ny faneken'ny fihavanako, hoy ny Tompo, Mpamindra fo aminao. Ary raha misy manota, dia manana Solovava ao amin'ny Ray isika, dia Jesoa Kristy, Ilay Marina; ary Izy no avotra noho ny fahotantsika, ary tsy noho ny antsika ihany fa noho ny an'izao tontolo izao koa » (Isaia 54.10 ; I Jaona 2.1-2) Matokia fa voavela ny helokao noho ny Anarany Masina. Miderà ny Tompo, Haleloia.

Fiangonana : Amen* (hiraina)

FANKALAZANA(Gloria)

Mpitarika: Voninahitra ho any amin'ny Avo Indrindra ho an'Andriamanitra*

Fiangonana: Ary fiadanana ho ety ambonin'ny tany amin'ny olona ankasitrahany*

FIFAMPIZARANA NY FIADANANA.

Mifandray tana ny mpianakavin'ny finoana

Zava-maneno- Interlude-

FOTOANAN'NY SEKOLY ALAHADY

FAMAKIANA NY SORATRA MASINA

Fiomanana amin'ny Vakiteny sy ny Toriteny

Hira FF6 :1

Mpitarika: (vavaka hampahazava ny Teny)

Fiangonana: Amen

Testamenta Taloha sy Epistily: **Genesisy 2 :18-24 ; Hebreo 2 :9-11**

Filazantsara: **Marka 10 :2-16 (mitsangana ny Fiangonana)**

Fiangonana: Isaorana anie ny Tompo noho ny Filazantsara ! Amen(hiraina)*

FANEKEM-PINOANA (mitsangana)

Mpitarika: *Miaraka amin'ny Fiangonana kristiana rehetra manerana ny tany dia manambara ny finoantsika isika: « Mino an'Andriamanitra Ray Tsitoha Mpanao ny lanitra sy ny tany aho. Ary mino an'i Jesoa Kristy Zanany Lahitokana Tompontosika, izay notorontoronina tamin'ny Fanahy Masina, naterak'i Maria Virjina, nijaly raha nanapaka Pontio Pilato, nohomboana tamin'ny hazo fijaliana, maty ka nalevina, nidina tany amin'ny fiainan-tsi-hita, nitsangana tamin'ny maty tamin'ny andro fahatelo, niakatra ho any an-danitra, mipetraka eo an-kavanan'Andriamanitra Ray Tsitoha ; avy any no hihaviany hitsara ny velona sy ny maty. Mino ny Fanahy Masina aho, ny Fiangonana masina manerana izao tontolo izao, ny fiombonan'ny olona masina, ny famelan-keloka, ny fitsanganan'ny tena amin'ny maty ary ny fiainana mandrakizay. Amena. »*

Hira FF6 :2 (mitsangana)

TORITENY

Fitahiana : «Ho aminareo anie ny Fahasoavan'i Jesoa Kristy Tompo, sy ny Fitiavan'Andriamanitra Ray ary ny Firaisana avy amin'ny Fanahy Masina. Amena. »

Feon'orgue malefaka dia malefaka sy vavaka mangina

ANTOKO MPIHIRA (FIDERANA -LOUANGE)

BATISA 248 :1,4

FANOKANANA KATEKOMENA HO MPANDRAY VAOVAO 444 :1, 2,4

Hira 459 :2

FANASAN'NY TOMPO

Sursum corda

Mpitarika : Asandrato ny fonareo ho eo amin'ny Tompo*

Fiangonana : Asandratray ny fonay ho eo amin'ny Tompo*

Mpitarika : Aoka hoderaintsika ny Tompo Andriamanitra*

Fiangonana : Mendrika ny hoderaina lzy !*

VAVAKA FANOMBOHANA

Mpitarika : Eny tokoa Tompo, Ray Masina, Andriamanitra Mandrakizay, mahefa ny zavatra rehetra, mety sy mahavonjy ny hisaoranay Anao amin'ny fotoana rehetra sy amin'ny toerana rehetra amin'ny alalan'i Jesoa Kristy Tomponay, Izay tia anay sy nanolotena hamonjy anay. Amin'ny alalany koa no hideran'ny anjely ny fiandriananao sy hitsaohan'ny fanapahana sy ny fahefana rehetra Anao amin'ny tahotra ary hiarahan'ny fiangonana any an-danitra sy ety an-tany midera ny anaranao amin'ny fihobiana ary izahay koa ankehitriny miara-manandratra ny feonay aminy ka amin'ny fanajana lehibe no hideranay hoe:

Hira : Antema 1 : Masina ! Masina ! Masina ! Jehovah Tompo, feno ny voninahitrao izao rehetr'izao, ry Tompo ô, amen.

TENY FANORENANA

Mpitarika : Jesoa Kristy Tompontosika, tamin'ny alina izay namadihana Azy dia nandray ny mofo, ary rehefa nisaotra Izy dia novakiany ka hoy Izy : « **Raiso, hano, ity no Tenako Izay omena ho anareo, izao no ataovy ho fahatsiarovana Ahy.** » Ary toy izany koa ny kapoaka, rehefa nihinana dia hoy Izy : « **Misotroa amin'ity ianareo rehetra, fa ity no Ràko, dia ny amin'ny fanekena vaovao, izay alatsaka ho an'ny rehetra ho famelan-keloka. Koa na oviana na oviana no misotro ianareo dia izao no ataovy ho fahatsiarovana Ahy.** »

VAVAKA (mipetraka)

Mpitarika: Ry kristiana malala, aoka isika hahatsiaro an'i Jesoa Kristy Izay maty nisolo antsika sy nitsangana ho fanamarinana antsika, dia fanati-pihavanana natolotr'Andriamanitra antsika, ary aoka isika hiara-misaotra sy hivavaka:

ANAMNÈSE

Mpitarika: Misaotra Anao izahay Andriamanitra Rainay, Tompon'ny lanitra sy ny tany fa noho ny famindramponao aminay mpanota mahantra, dia nomenao ny Zanakao Lahitokana, mba tsy ho very izay rehetra mino Azy, fa hanana fiainana mandrakizay. Rainay any an-danitra ô, indreto izahay manao eto anatrehanao ny fahatsiarovana ny fahatongavan'ny Zanakao ho olona, ny fijaliany sy ny fahafatesany, ny fitsanganany tamin'ny maty ary ny fifonany mandrakizay ho anay, ka miandry sy mitalaho ny fiverenany izahay.

Fahanginana

EPICLÈSE

Mpitarika: Ankehitriny Ray o, aidino ny Fanahy Masina mba hameno ny fonay, ka handraisany tokoa ny Tomponay amin'ny finoana velona, amin'izao Izy manatona anay amin'ny alalan'izao fanasana izao.

Fiangonana: Ry Jesoa Kristy Tompo ô, izahay izay tonga eto anatrehanao hiombona amin'ny latabatrao masina dia mangataka mba hampiraisinao Aminao, ohatry ny sampana amin'ny voaloboka. Ampianaro hifankatia tahaka ny nitiavanao anay izahay. Ary aoka izahay hiara-manana amin'ny fiangonana masina manontolo ny fiononana sy ny fifaliana Aminao. Amen.

Hira 115:4 (mitsangana)

Mpitarika: Efa nandray ny Fanahy maha-zanak'Andriamanitra antsika isika, koa afaka manambara hoe: *Rainay ô Izay any an-danitra*, Hohamasinina anie ny Anaranao. Ho tonga anie ny fanjakanao. Hatao anie ny sitraponao ety an-tany tahaka ny any an-danitra. Omeo anay anio izay hanina sahaza ho anay. Ary mamela ny helokay tahaka ny namelanay izay meloka taminay. Ary aza mamela anay ho azon'ny fakam-panahy, fa manafaha anay amin'ny ratsy. Fa Anao ny fanjakana sy ny hery ary ny voninahitra mandrakizay. Amena !

FAMAKIANA NY MOFO SY FANANDRATANA NY KAPOAKA

Mpitarika: Ny mofo izay vakiansika dia firaisana amin'ny tenan'i Jesoa Kristy Tompontosika
Ny kapoaky ny fisaorana izay isaorantsika dia firaisana amin'ny Ràn'i Jesoa Kristy Tompontosika.
Hoy ny Tompo: avia, fa efa voavoatra ny zavatra rehetra.

Fandraisana: 254 ; 259

Mpitarika: Hoy Jesoa Kristy Tompo: **Raiso, hano ity no Tenako Izay omena ho anareo. Izao no ataovy ho fahatsiarovana Ahy.** (vavaka mangina)

Hoy Jesoa Kristy Tompo: **Sotroinareo rehetra ity, fa ity no Ràko, dia ny amin'ny Fanekena vaovao izay alatsaka ho an'ny rehetra ho famelan-keloka. Izao no ataovy ho fahatsiarovana Ahy, na oviana na oviana no misotro ianareo.** (vavaka mangina)

TENY FAMPAHEREZANA (Exhortation)

Mpitarika: Jesoa Kristy Tompontosika Izay voahombo tamin'ny hazo fijaliana ka nitsangana tamin'ny maty no efa nanome anareo ny Tenany sy ny Ràny izay nanavotany anareo tamin'ny fahotana rehetra, Izy anie no hampahery sy hiaro anareo amin'izany amin'ny finoana marina ho fiainana mandrakizay. Ho aminareo anie ny fiadanana.

Mpandray: Amen

Hira 172:3

Vavaka: Andriamanitra Tsihoa sy mandrakizay o, misaotra Anao izahay fa efa sitrakao tokoa ny namahana anay tamin'ireny zava-tsoa ireny, dia ny Tenan'i Jesoa Kristy Zanakao Mpamonjy anay, sy ny Rany soa

sarobidy, ka nampahatoky anay ny fitiavanao sy ny fahatsaranao ary ny fanaovanao anay ho sampana velona momba ny Tenan'ny Zanakao. Mangataka Aminao izahay, noho ny famindramponao hihazona anay amin'izany fiombonana masina izany, ka handehananay mamoa voa tsara amin'ny fitiavana sy ny faharetana, amin'ny alalan'i Jesoa Kristy Tomponay.

Fiangonana: Amen

Fanangonana ny kapoaka

FILAZAN-DRAHARAHA

RAKI-PISAORANA : FF34 ; 39

Fanolorana ny Rakitra : Ry Tompon'ny harena ô !

VAVAKA FISAORANA SY FANGATAHANA (Prière d'intercession)

Hira 336 :1

TSODRANO

Mpitarika: Ho aminareo anie ny Tompo*

Fiangonana: Ary ho amin'ny fanahinao*

Mpitarika: Hitahy anareo anie ny Tompo ka hiaro anareo. Hampamirapiratra ny tavany aminareo anie ny Tompo ka hiantra anareo. Hanandratra ny tavany aminareo anie ny Tompo ka hanome anareo fiadanana *

Fiangonana: Aleloia ! Amen *

Mpitarika: Voninahitra ho an'Andriamanitra Ray sy Zanaka ary Fanahy Masina Izay hatramin'ny taloha indrindra ka ho mandrakizay, amen. Mandehàna amin'ny fiadànana, ka manompoa ny Tompo ary torio amin'ny teny sy ny asa ny Filazantsara.

Fiangonana: Isaorana anie Andriamanitra.

Amin'ny anaran'ny Ray sy ny Zanaka ary ny Fanahy Masina. Amen